

գութեան ուխտս երանաւէտ համբուրիւ ողջունէին զսրբոյ պատրիարդին ոտս, և նորին հրամանաւ ուղարկեալք անտի ոսկեղէն և արծաթեղէն սպասուք և բազում նշխարօք յամենայն սրբութեանցն Աստուծոյ, յարագուարճ ցնծութեամբ հրաժարեալք քահանայիւք հանդերձ գնային, և եկեալ հասանէին ի սուրբ պահս քառասնորդացն յեօթներրորդ շաբաթու պասեքի Ջատկին ի ձորախորխում անտառայր մայրաստանիկ աշխարհն Արցախայ ի գաւառն Մեծ-կուենից, և ի կիրճս ճանապարհին երկաջոկեալ գունդն յերկուս բաժանելով՝ նստէին զուբարս յայնմ տեղոջ, որում Աստեղն կոչեն բլուր ի հիւսիսոյ կողմանն, իսկ գունդն երկրորդ յայնկոյս Տրդուական գետոյն ի հարաւական կողմանն ի մայրուորտ հովտին ի պուրակին բնակէր Չղախ անուանելոյ, զի ուխտիւք խոստացեալ էին առ միմեանս կատարել ի տեղոջն զամենասուրբ Ջատիկն»:

Իսկ Թարգմանչի բերած Խաչի գտնուելու համար նոյն Պատմագիրը այսպէս ասէ (Հատ. բ. գլ. 14 յեր. 171 — 175):

«Արդ յետ անցանելոյ ամ մի ի վերայ այնորիկ, սակս նախագուշակ հրամանին որ ի վերուստ եղև նմա զագղումն, ցանկութիւն յոյժ ունէր սուրբ երէցն (Խսրայէլ.) խնդրել զփափագելի Խաչն՝ զձածկեալն սրբոյն Մաշտոցի ի Գիս անուանեալ գիւղն, որ յմտի գաւառի: Եւ վասն զի ինքն առաջին ի բարի եղբարց զսիրոյն ունէր զպատուիրան խորհելով առ ամենեսեան և զգեցեալ զճշմարտութիւն Աստուծոյ ի ծածուկ, վասն այն բարեխնամաբար հոգացեալ զբոլորիցն օգուտ ոչ հռչակէր զձածուկ խորհուրդն ի հանդէս ամբոխից և խուսափել ջանայր ի մարդկան զովեստից՝ փախչելով ի փառամոլ և ի սնապարծիկ ախտից, վասն այնորիկ զմի ոմն ի սրբասնելոցն քահանայից ի նախամեծար պատուաւորաց հետեոզ իւրումն գիւտին առնէ, և ոչ ժողովով կամէր զերթն, այլ նովաւ հանդերձ հասանէր ի նախասացեալ վայրսն՝ ի հին եկեղեցին: Եւ ոչ զիտելով ստուգել և նշմարել գտեղին՝ նոյն ժամայն նշան զարմանալի լինէր ի վերայ սաղարթապատ ծառոցն նոճից, որք երկաքանչիւր աստի և անտի միջաւորեալ ունէին յինքեան զկոշարանն սուրբ, յոր իբր թէ ծագումն ինչ լուսոյ երևեալ բոցաճաճանչ կամա-